

**MINISTRU ESTADU PREZIDÉNSIA KONSELLU MINISTRUS NIAN  
AGIO PEREIRA**



**DISKURSU**

**ANÁLIZE KONA-BA KESTAUN JURIZDISAUN NO ADMISIBILIDADE NIAN SIRA:  
LISAUN SIRA HUSI KONSILIASAUN (NO KAZU SIRA SELUK)**

**WORKSHOP IHA FÓRUM REJIONÁL ASEAN NIAN, DILI, LORON 27 FULAN-FEVEREIRU TINAN  
2020**

Obrigadu Embaixador Soares.

Loro-kraik di'ak ilustre konvidadu sira, señor no señora sira.

Ha'u gosta tebetebes ita-nia sesaun iha dadeer ida-ne'e. Ha'u hanoin katak sesaun ne'e apresenta ona relatu ida ne'ebé di'ak kona-ba konsiliaaun entre Timor Leste no Austrália, no mós kona-ba lisaun ne'ebé ita hotu bele aprende husi ninia susesu.

Sesaun ida-ne'e fó dalan mai ita atu bele hatene kle'an liután kona-ba aspetu importante ida husi konsiliaaun no rezolusaun litíjiu sira, iha aspetu jerál liután sira: kestaun kona-ba kompeténsia no admisibilidade.

Ha'u kontente tebes tanba hamutuk dala ida tan ho painél ida ne'ebé matenek tebetebes no iha kualifikasaun aas, hanesan señor James Larsen no señora Tara Devenport. Dalaruma ha'u tenke husik hela pontu sira ne'ebé tékniku no jurídiku liu ba ha'u nia belun sira husi painél ne'e, maibé ha'u hein katak bele fó ba imi ideia ida kona-ba perspetiva Timor-Leste nian kona-ba kestaun jurizdisaun nian, liuliu hirak ne'ebé maihusi konsiliaaun. Ha'u bele hateten klaru katak, durante ita-nia diskusaun, ita mós sei bele aprende lisaun husi kazu sira seluk iha rejiaun ne'e.

Ita hotu hatene no nota katak konseitu fundamentál ida mós husi direitu internasionál maka soberania Estadu sira-nian. Ida-ne'e asume forma oin-oin, maibé inklui soberania jurizdisionál kona-ba rai sira, no, iha ámbito UNCLOS nian, inklui obrigasaun hodi delimita direitu soberanu sira iha tasi nian. Liuhusi konsiliaaun, Timor Leste no Austrália bele delimita ita-nia direitu tasik soberanu ho forma bilaterál iha Tasi Timor.

Norma seluk direitu internasionál nian, ne'ebé iha karakterístika seluk no kompleksa liután, ne'ebé konsiliaaun mós hatudu ona, maka konsentimentu Estadu nian: Profesór James Crawford define konsentimentu hanesan:

*...Jurizdisaun tribunál internasionál sira nian depende ba autorizasaun husi parte sira; Adezaun ba organizasaun internasionál sira la obrigatória; no órgaun sira husi organizasaun sira-ne'e ninia poder sira atu determina ninia kompeténsia rasik, foti desizaun sira husi maioria no obriga desizaun sira, nu'udar konkluziun, depende ba konsentimentu Estadu-Membru sira-nian.*

Groseiru (kasar) uitoan hateten ida-ne'e, maibé loos duni Estadu sira hili aspetu sira husi sistema internasionál, ka órgaun husi internasionál sira ba litíjiu, ne'ebé sira hakarak rekoñese. Liberalizmu fornese baze ideolójika ne'ebé insentiva Estadu sira hodi aseita jurizdisaun tribunál internasionál sira-nian, tanba atu halo atuaun tuir orden ne'ebé nakloke no bazeia ba regra sira, hamutuk, serve interese Estadu hotu-hotu nian.

Timor-Leste, hanesan Estadu kí'ik no iha hela faze dezvoltamentu nian, iha istória ida-ne'ebé únika kona-ba interasaun ho sistema direitu internasionál nian. Ami-nia fiar ba orden liberál kolektiva signífika katak ami aseita jurizdisaun husi tribunál internasionál prinsipál sira, tanba interasaun hirak ne'ebé justa no bazeia ba regra entre Estadu sira, ne'e importante tebetebes ba ami-nia interese nasional.

Maibé, iha ámbitu kompleksidade husi disputa entre Estadu no interasaun entre Estadu sira, ideál liberál ida-ne'e hamosu dezafiu. Estadu balun la aseita jurizdisaun husi tribunál internasionál prinsipál sira, hanesan Tribunál Internasionál Justisa nian ka Tribunál Internasionál ba Direitu Tasik. Aleinde ne'e, iha prátika komún ida kona-ba kontesta jurizdisaun husi órgaun litíjiu nian ne'ebé relevante iha definisaun litíjiu nian ruma.

Kona-ba arbitrajen internasionál privada sira, parte ne'ebé atu kestiona, kontesta beibeik jurizdisaun tribunál arbitrál nian. Tátika ida-ne'e baibain uza nu'udar forma atu hetan lalais kestaun 'lakon ba'. Ha'u kompriende razaun hirak ne'ebé haksumik an iha asuntu ne'e iha kontestu komersiál no privadu ida, tantu entre Estadu ida ho investidór ida ka entre investidór rua ne'ebé iha sofistíkasaun hanesan. Maibé, kona-ba asuntu ida-ne'e, ha'u hanoin ita bele distinge entre litíjiu sira husi direitu internasionál privadu no públiku.

Disputa entre Estadu sira asume grau solenidade nian, orgullu no simbolizmu ida-ne'ebé boot liu. Estadu sira mak entidade soberana, no bainhira Estadu ida buka ezije ba Estadu seluk kona-ba konta sira iha sistema internasionál, persesaun kona-ba subjugasaun Estadu ida-ne'e nian ba "podér ne'ebé boot liu" sai nu'udar kestaun diplomátika ne'ebé sensível. Ita haree ida-ne'e iha tipu disputa nian hotu-hotu entre Estadu sira.

Nune'e, hanesan iha sistema privadu, litíjiu sira iha sistema públiku internasionál direitu nian mós dala barak sujeita ba argumentu jurizdisional no argumentu sira kona-ba kompeténsia iha inísiu, iha ne'ebé Estadu inkiridu buka atu asuntu ne'e bele arkiva tanba razaun jurizdisional, envezde liuhusi méritu substantivu sira.

Ha'u aseita katak, iha sirkunstánsia balu, ida-ne'e, naturalmente, iha justifikasaun. Hanesan ezemplu, iha kazu litíjiu vexatóriu ida. Nune'e mós, hanesan ha'u hanoin katak konsiliaun hatudu tiha ona, iha benefísiu atu hakat liu argumentu jurizdisional sira no atu tama ba méritu diferendu nian. Estadu sira tenke haree ba inísiu litíjiu ida nian hanesan oportunidade ida envezde hanesan dezafiu ida ba ninia supremasia iha sistema internasionál.

La hanesan ho litíjiu privadu hirak ne'ebé maka limita an liu ba kestaun komérsiu no negósiu nian, rezolusaun litíjiu ida ho baze estatál loke odamatan ba rekompensa diplomátika ne'ebé luan liu. Ho liafuan seluk, Estadu sira iha kapasidade atu hetan benefísiu hirak ne'ebé boot liu husi rezolusaun ba ninia litíjiu duké entidade privada sira. Afinál, Estadu sira interaje iha domínio luan no kompleksu oioin, no la'ós de'it iha baze kontratuál ida.

Ha'u hanoin katak konsiliaun ne'e maka estudu kazu ida ne'ebé perfeitu kona-ba nosaun ida-ne'e.

Iha fulan-agostu tinan 2016, Timor-Leste no Austrália ba ona Komisaun Konsiliaun atu halo audiénsia nakloke durante loron ida, tuir fali audiénsia ne'ebé taka ba públiku durante loron rua kona-ba argumentu jurizdisionál sira.

Hanesan buat ne'ebé maka tuirmai Komisaun divulga ona, dezafiu prinsipál Australia nian kona-ba jurizdisaun Komisaun ne'e bazeia ba saida maka hanaran dispozisaun moratória husi CMATS, ne'ebé hakarak atu adia diskusaun kona-ba ketan tasik permanente sira. Austrália mós argumenta ho pontu tékniku seluk lubuk ida, ne'ebé inklui katak diferendu ne'e la mosu molok UNCLOS hahú vigora, tanba Timor-Leste foin ratifika UNCLOS iha tinan 2013.

Iha fulan-setembru tinan 2016, Komisaun divulga ona nia desizaun kona-ba kompeténsia. Divulgasaun ne'e hanesan rezultadu estraordináriu ida. Iha sira-nia argumentu neen ne'e hotu, membru Komisaun na'in-lima decide ona ho lian ida de'it atu vota afavór ba Timor-Leste. Ha'u simu informasaun ne'ebé loloos katak rezultadu ida hanesan ne'e la naran hetan.

Buat ne'ebé afavór ba Austrália maka faktu katak, maske ninia pozisaun inisiál kona-ba jurizdisaun, tanba Komisaun decide ona atu kontra Austrália, nasaun ne'e decide ona atu partisipa ho *hanoin di'ak* bainhira ita hakat ba faze substantiva.

Maibé, mai ita tetu took, uitoan, katak Austrália hetan ona susesu iha ninia argumentu katak Komisaun Konsiliaun ne'e laiha kompeténsia. Ita bele dehan katak konsiliaun ne'e nunka la'o ba oin.

Iha kontestu ida-ne'e, Timor-Leste, hakarak ka lakohi, tenke tetu didi'ak atu hili entre aseita tratadu provizóriu sira kona-ba fahe rekursus, ka konsidera fali opsaun legál sira seluk, hanesan ezerse direitu hirak ne'ebé prevee iha ámbitu CMATS nian atu anula rasik tratadu ne'e, buka paresér konsultivu ida husi TPI ka buka lori direktamente kestaun ne'e ba Nasoins Unidas. Ha'u hanoin katak ida-ne'e la'ós interese husi kualkér Estadu ida no, klaru katak, sei la proporsiona seguransa investimentu nian ba empreza petrolífera no gás nian sira ne'ebé iha interese iha Tasi Timor. Konsiliaun konsege analiza ona kona-ba kestaun sira-ne'e iha tinan-rua nia laran.

Iha senáriu seluk, ita bele imajina katak Austrália decide duni atu la kontesta kompeténsia Komisaun ne'e nian no, envezde kontesta, avansa kedas ba konteúdu disputa nian. Ida-ne'e bele haruka ona mensajen positiva ida ba Komisaun no Timor-Leste katak Austrália hakarak atu rezolve disputa ne'e no hahú rezolve impase ne'e. Maibé, hanesan ita hotu hatene, Austrália kontesta duni Komisaun nia kompeténsia. Ne'e duni, karik Austrália la halo kontestasaun hasoru kompeténsia Komisaun nian, ida-ne'e bele sai hanesan surpresa ida, tanba haree ba

ninia polítika durante tempu naruk, katak tratadu provizóriu sira kona-ba fahe rekursus halo tuir duni UNCLOS.

Husi sorin seluk, iha konsiliaun nia laran ita haree ona benefísiu sira husi envolvimentu iha faze méritu nian sira. Ohin, ita bele haree momoos ona benefísiu diplomátiku sira-ne'ebé luan liu, ne'ebé prosesu konsiliaun nian lori ona mai ita-nia relasaun bilaterál.

Dezde konsiliaun ne'e, ami simu ona ministru Negósíus Estranjeirus na'in-rua husi Austrália no simu mós sira-nia Primeiru-Ministru rasik iha Dili; vizita ministeriál nivel aas hirak ne'e nunka akontese dezde tinan 2012. Aleinde vizita ofisiál sira-ne'e, ita-nia Estadu rua agora daudaun buka atu hakle'an no haluan ita-nia kooperasaun iha área oioin. Agora ita hateke ba futuro, la'ós ba pasadu. Kooperasaun alargada liután ne'e sei la akontese bainhira konsiliaun la la'o ba oin. Ha'u la hatene ita-nia relasaun ohin-loron sai oinsá karik ita labele rezolve ita-nia disputa sira. Klaru katak iha momentu ne'ebá maka mosu tan adiamentu ruma atu rezolve disputa, ida-ne'e la'ós interese husi empreza mina-rai no gás nian hirak ne'ebé hala'o daudaun operasaun iha Tasi Timor.

Rezolusaun disputa entre Estadu sira la hanesan ho rezolusaun litíjiu privadu nian sira. Maske disputa rua-ne'e iha karater internasionál hotu, bainhira diskute kestaun sensivel kona-ba soberania, ha'u hanoin katak Estadu sira tenke iha vontade liután atu partisipa, envezde buka kedas dalan atu oinsá disputa ne'e "lakon". Rezolve litíjiu entre Estadu sira ho dame nu'udar buat ne'ebé atu selebra no la'ós hasees tiha fali.

Nu'udar konsiliaun hatudu ona, eziste benefísiu signifikativu sira ba envolvimentu, ba partisipasaun ho *laran moos* no ba aproveita oportunidade atu rezolve litíjiu sira ba benefísiu iha prazu naruk nian. Ida-ne'e koerente duni ho orden liberál internasionál.

Obrigadu Embaixador Soares no obrigadu ba ha'u-nia belun sira iha painél.